

# Melaka sedia pelan alternatif urus sampah - EXCO

Fiqa Jamal

**AYER KEROH** - Kerajaan negeri tidak pernah bersikap lepas tangan dalam segala isu membabitkan kepentingan rakyat termasuk membabitkan masalah sampah yang dikhuatiri tidak mampu dibendung dalam beberapa tahun lagi.

EXCO Kerajaan Tempatan dan Alam Sekitar Negeri Datuk Zaidi Attan berkata, walaupun data menunjukkan tapak pelupusan sedia ada hanya mampu bertahan sehingga Sept 2024, namun pihaknya sudah bersedia untuk mengatasi masalah tersebut.

Dalam satu wawancara bersama Melaka Hari Ini, Zaidi memaklumkan terdapat beberapa pelan alternatif sudah dirangka untuk memastikan masalah pelupusan sampah dan sisa pepejal di negeri ini dapat diatasi sebaiknya.

Menurutnya, antara langkah utama yang diambil kerajaan ialah membangunkan sebuah projek Loji Sisa ke Tenaga (WTE) atau insinerator yang berfungsi melupuskan sisa pepejal secara lebih efektif tanpa membabitkan ruang yang besar.

"Insinerator ini sangat bagus kerana ia boleh menjadi satu mekanisme baharu untuk negeri menjana tenaga dan pada masa sama mengurangkan bebanan kewangan kerajaan negeri dalam menyediakan pusat pelupusan sampah.

"Perlu tahu bahawa kos untuk tapak pelupusan sampah bukanlah rendah yang mana kita berdepan bebanan apabila kuantiti sampah di negeri ini terus meningkat saban tahun.

"Sebelum ini kita jangka kuantiti sampah di Melaka adalah pada kadar 500 tan hingga 800 tan sehari, namun kini ia sudah mencecah 1,000 tan sehari sebelum tiba pada masanya.

"Sebab itulah pentingnya ada loji WTE atau insinerator ini yang bukan sahaja membantu aspek pelupusan sisa pepejal, bahkan membantu kita menghasilkan tenaga yang boleh menjana pendapatan," katanya.

Meskipun segala perancangan mengenai projek insinerator itu telah bermula awal, namun Zaidi mengakui terdapat beberapa kekangan yang menyebabkan projek berkenaan masih tergendala.

Jelasnya, masalah itu disebabkan beberapa isu teknikal terutamanya membabitkan aspek pemilikan tanah yang sedikit merencatkan pembinaan insinerator berkenaan.

Oleh sebab itu, menurutnya, satu lagi pelan sandaran (back-up plan) telah dilakukan iaitu membangunkan tapak pelupusan (landfill) ketiga di negeri ini.

Katanya, tapak pelupusan itu

siap dibangunkan di tanah seluas hampir 26 hektar di Tapak Pelupusan Sisa Pepejal Sanitari Sungai Udang, yang mana ia kini dalam proses pembinaan dan pengambilan tanah.


"Jadi proses ini telah selesai pada 18 Jan lalu dan ia dalam proses pembinaan dan kitayakin ia dapat menyelesaikan masalah sampah sekiranya insinerator tidak

siap mengikut jadual.

"Ini bermakna, apa-apa yang akan berlaku daripada sekarang hingga Sept 2024 nanti, kita sudah bersedia sedia dengan pelan A dan pelan B untuk memastikan pengurusan sampah di Melaka berjalan lancar," ujarnya.



**ZAIDI** dalam wawancara khas bersama Melaka Hari Ini. Foto: Iqmal Haqim Rosman



**ILUSTRASI** perancangan pengurusan sisa pepejal di Tapak Pelupusan Sanitari Sungai Udang.

## Infografik

# PELAN PENGURUSAN SISA PEPEJAL DI MELAKA

### APA ITU INSINERATOR?

Insinerator atau Loji Sisa ke Tenaga (WTE) merupakan antara kaedah pelupusan sisa pepejal dengan cara pembakaran. Ia bertindak membakar sisa di samping meminimumkan jumlah pelupusan sisa pepejal di tapak pelupusan sampah. Kaedah pembakaran itu mengamalkan konsep teknologi hijau dan dikawal rapat Jabatan Alam Sekitar (JAS) untuk mengelakkan pencemaran.

### INSINERATOR DI MELAKA

Akan dibangunkan di Tapak Pelupusan Sisa Pepejal Sanitari Sungai Udang di tanah seluas 3.84 hektar.

### STATUS PEMBINAAN

Masih tergendala disebabkan isu teknikal termasuk pemilikan tanah.

### DIJANGKA SIAP

Sasaran 2026

### PLAN KONTINJENSI

- Membangunkan tapak pelupusan (landfill) baharu di tanah seluas hampir 26 hektar di Tapak Pelupusan Sisa Pepejal Sanitari Sungai Udang
- Dijangka boleh digunakan bermula 2023

